



Орган Лемковского Союза

Выходит в каждый четверг.

Редакция и администрация в Крынице. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долшом оголошеню значна знижка.

Конто чекове Нр. 404.155.

Всіх читателей, котры не вплатили ище пренумераты, просиме выровнати якнайскорше рахунки.

Уж появил ся багато иллюстрований календар „Лемка“ на рок 1937. Крім того выдано также малый кышенковый календарик для дітей и великий календар стінный. Календар на р. 1937. ест выданий в ограниченном числі екземплярей и тому, кого хоче достати, мусит якнайскорше замовити его в администрации газеты „Лемко“.

Ціна одного екземпляра выносит 50 грошей

и кошты пересылкы. При замовленю понад 10 календарей кошты пересылкы покрыват администрация „Лемка“, котра дае также оден календар даром.

Доход с малых календариков, котрых ціна выносит 10 грошей, перезначаме на Руску Бурсу в Горлицах.

Редакция.

О колонии для Польши.

Делегат польский зажадал на засіданю Лиги Народов признаня Польщі колонии. Выступлене Польши на межнародном терені в ділі колоний звернуло увагу польского населения на тоту важну проблему, котра до тепер не всіма была належито доціняна.

Аж тепер клич тот высуват ся на перед всіх справ, а в першой мірі справ господарчих. Колонии, то одно с головных условий добробыта и розвита нашего, так страшно перенаселеного краю. Перенаселене тото предстарят ярко статыстыка. На кажде 100 гектаров рольно-ужиткового ґрунту припадат в Польщі 46-еро люда, котрых головным жерелом заробку и удержаня ест работа на той землі.

Такого перенаселеня ніт в жадном краю Европы. В Голяндии на 100 гектарах живе 41 людей, в Бельгии — 36, в Німеччині и в Италии около 34 и т. д.

Але Голяндия, Бельгия и Италия сут краями колонийныма и мают где высылати надрыжку своего населеня, а Польша, перенаселена найбільше, не має колонии и отплыва для надміра своего населеня. Тото усте для надвыжкы населеня, не находячого в краю работы, Польша мусит найти, штобы мати терены для поселеня и для торговельной експансии.

Польша не має суровых материалов, котры находят ся в колониях, а колонии требуют промысловых товаров. Знаючи о том, не трудно представить собі користи, выплываючи с набытя колоний. Держава одержує

с колонии суровы товары, за котры не платит великих сум. Тоты товары перерабят в фабрыках и фабрычны выробы высылат до колоний. Оживят ся в краю промысел и торговля, тысячи безработных достають роботу в фабрыках и счезат безработе, тота найбільша біда теперешного часу. Тому то всі державы стремят до того, штобы мати як найбільше колоний. На колониях доробили ся маєтку Німеччина, Англия, Франция и инши.

Бои о Мадрыт идут дальше.

Минувший тыждень не принес рішення в кырвавых боях о опановане Испании. Бои мали перемінне счастье, котре переходило то ку одним, то ку другим. В пару случаях отділы червеных войск потрафили отперти атаки повстанцов и змусити их до отворота. Червены войска мают штораз больше и лучшего оружия. По остатным донесениям, до испанских портов прибывають советеры кораблі с транспортами оружия и техничной обслугы.

С другой стороны повстанцы, котры мают перевагу в летунстві, не могут тепер атаковать Мадрыта со взгляда на фатальны атмосферичны условия. Дожджи, снігы и барз густы гмылы унеможливают подяте летничой акции со стороны повстанцов. Однак не меньше повстанчи войска розвивають боеву акцию на других фронтах. И так на водах в барцельонской пристани повстанча подводна лод-

ка зничила правительственный корабель. Вызвало тото зрозуміле порушене серед членов мадрытского правительства. Оскаржают они о тото німцов и италиянов, твердячи, же повстанцы подводных лодок не мали. Німеччина и Италия перечат тому рішительно.

Давнійше доходили державы до колоний путем завоеваня. Тепер звычай ся змінили и державы, аджек и Польша хоче одержати колонии в дорозі справедливого приділа колонийного мандата, штобы найти терен для своего поселеня и для торговельной експансии. Так поставлена справа може быти полагоджена успішно и принесла бы населеню Польши величезны користи.

Як видно с того всего, не заносит ся на скоре окончене кырвавых боев в Испании. Обі стороны рішили держати ся до послідного. Котра с них побідит? Увидиме.

Мадрыт: Повстанчи самолеты поробили значны шкody в Мадрыті. Дома в гдехотрых кварталах сут знижены. Тысячи людей опустили свои хаты, замінены в руины. Тоты, котры схоронили ся в пивницях гдеяких домов были живы через бомбы погребаны. Понад 10.000 людей остало без даху над головою.

Справа перенаселеня Польщи на комісії в Женеві.

В Женеві отбыло ся засідане сталої комісії для справ меженародной емиграції. На засідане том делегат Польщи, мин. Комарницький выголосил основну промову, в котрой ствердил, же Меженародна Организация Труда мусит найти новы колонизаційны терены, на котры можна бы было выслати людей с перенаселеных краев.

Мин. Комарницький при той случайности представил справу перенаселеня в Польщи, котре вымагат заряджень в трох напрямках: 1) публичных работ в великих розмірах, 2) оживленя рольной продукції и 3) оживленя емиграції.

Два перши средства вымагают великих капиталов, а емиграция ест узалежнена от усуненя трудности, якы повстали в той области по войні.

Делегат польского правительства зложил проект резолюции, в котрой домагат ся конференции знатоков заинтересованных краев для приготовления проектов розвязки поселенческой проблемы в таком термини, штобы собрание Лиги могло познакомиться ся с нима на найблизшой звычайной сесии.

Смерт 300 горников в заляной копальні.

В полночной Японии в місцевости Оса-рузава на острові Гондо от оборваня хмары трісла величезна запора водна и маса воды заляла ціле село и находячу ся там копальню міді, в котрой робило 300 работников. С копальні не вышол с житем ани оден работник.

Также численны сут жертвы в заляном селі. Ведля донесень число жертв доходит до тысяча.

Дві желізнодорожны катастрофи.

В четверг 19. листопада в Хабувці на штреці Краков — Закопане мала місце трагична жел.-дорж. катастрофа, в котрой 4 особы нашли смерть, 5 людей было тяжко и 8-ро легко раненых.

При поїзді, ідучом с Закопаного до Кракова и маючом 13 вагонов с незнанных причин выскочили с шин 2 вагоны, при чом оден с них розбил ся цілковито, а другий сильно ушкодил.

В два дні погодивше, в суботу также с незнанных причин выскочил с шин скорый поїзд ідучий с Варшавы на стации в Забержові о 15 км. от Кракова. Поїзд скатулькал ся с насыпу. Тяжкы раны отнесли лем урядники жел.-дор., а с пасажеров лем 3 особы сут легко ранены. Раненый кондуктор Виктор Щербовский с Кракова умер в шпиталі.

Пожичкы на родинны сплаты.

Министерство Рольництва и Реформ Рольных переказало Державному Банкови Рольному сумы в ціли уділяня долготерминных долгов на родинны сплаты.

Пожичкы на родинны сплаты будут уділяны выключно на ипотечны грунты властителям, посідаючим тытул власности, уявненый чистым вписом, причом наслідники могут старати ся о тоты пожичкы аж по окончено наслідственного поступаня и урегульованю тытула власности на свое назвиско.

Пожичкы могут быти уділяны на всякого рода сплаты родинны в тых случаях, если бы господарство в разі поділа меже членов родини втратило характер животного господарства.

Пожичкы тоты будут уділяны до высоты не меньшей як 1.000 зл., в каждом разі в границах половины усталеного через банк отаксованя недвижимости и забезпечены будут на першом ипотечном місци. Кошты отаксованя через банк выносит при пространстві от 5—15 гектаров 50 зл.

Пожичкы будут даваны на 10, 15, 20 и 25 літ. Процент выносит рочно 1½ процент.

Пожичкы не будут уділяны на господарства меньши от 5-гектаров и на господарства больши от 15 гектаров, а также на господарства, котрых властители не маюти ипотеки урегульованой чистым вписом на свое назвиско.

Розстріляны в Москві жиют и дійствуют в Испании.

Не так давно писали мы о великом процесі, який ведено в Москві. В процесі том заціли на лаві оскаржених два выбитны предводителя коммунистичны Зиновев и Каменев, котры мали мнимо организовати заговор против теперешним владітелям большевицкым, в першой мірі против Сталинови.

В процесі том выдано вырок, котрым засуджено обох выше наведених большевицких вельмож на кару смерти через розстрі-

ляне. Вырок выполнено. Так по крайной мірі доносили всі большевицкы газеты, а за нима и инши.

Тымчасом в тых днях появила ся сенсацияна вість, выпущена с кругов повстанчих Испании, же Зиновев и Каменев находят ся в Испании и там ведут оживлену діяльність в порозумленю с мадритским правительством.

60 убитых — 200 раненых по взрыві в фабрыці пороху.

Недалеко Марселии во Франции мала місце страшна катастрофа. В находячей ся там фабрыці пороху наступил выбух.

Фабрыка тотя занимает велике пространство, на котром побудовано ряд одноповерхных будынков, положених оден от другого дост далеко. Взрыв наступил в будынку отдаленом о 2 км. от входа до фабрыкы. С незнаной причины експлодовала находяча в специальном апараті мішалка, звана толитом. В послідствие взрыва сорвано дах над будынком. Чорны хмары дыму залягли цілый терен фабрыкы. Заалармовано зараз всіх работников с других павильонов. 200 работников под руководством инжинеров и майстров приступило до ратунку. В том часі наступил

другий взрыв, от котрого розлетіл ся цілый будынок.

Через цілу ноч робила пожарна сторожа и войско над усунанем розвалин, ратованем раненых и выдобыванем убитых.

С под розвалин будынку выдобыто 60 убитых и около 200 раненых. Стан многих раненых ест незвычайно грозный, в виду чого число убитых увеличит ся.

ПОМІЩАЙТЕ
ОГОЛОШЕНЯ
В ГАЗЕТИ „ЛЕМКО“.

Проч с тьмом!

Село Квятонь спало дост долго сном темноты и не знал о нем никто. Але пришол час, где ся оно пробуджат и начинат жити.

В 1934. р. открыто там читальню им. М. Качковского, котра оживила культуральну роботу в селі и особенно в послідном року выказуе рухливост и жизненность. Дня 22. XI. отограл завязанный при читальні аматорский кружок представлени „Ицко-Сват“, котре выпало на загал барз добре. В часі представления отспівал школений через студента Б. Соболяского ряд народных пісней.

Представленем и співом заинтересовали ся дуже місцевы и доокрестны люды и приняли в них масову участь.

Добрый тот примір Квятовян нехай берут также и сусідны села, нехай счезне у нас тьма а ей місце нехай займе правдива наука и просвіщене!

Ванцьо Бобок.

Дня 15. грудня т. р. начне ся в Поворознику новосандецкого повіта

КУРС ДЯКОВСКИЙ И ДЫРЫГЕНТОВ
ХОРА

котрый буде тревати 4 місяцы.

Близших информации и вписы принимат:

Васко Щавинский, Поворозник
поч. Мушина.

Зберайме два раз с поля, а будеме мати дост паши.

Як с теляти не доховаме ся доброй коровы, если будеме ему жаловати молока и сѣна, так само аж и барз добра корова не даст дуже молока, если будеме ю планно кормити. Кормлене добром пашом, містячом в собі білко, ест-основом для вытягнення доходів с хову домашніх звірят. Доходы тоты будут тым вышши, чим дешевша буде паша, аджек передовсем повинна она быти с власного господарства. Кормлене купном пашом лем в выключных случаях може ся оплатити н. пр. недалеко міст, где ест запевнений добрый збыт на сурове молоко. В нормальных условиях купны паши могут быти лем дополнением паш власных.

Не оден газда рад бы добре кормити статок, але што-ж зробити, коли цілий грунт обсянний зерном и окоповыма. Добре было бы собрати и два раз с поля, але ци можна думати о том при управі зерна и окоповых?

А однак огородники, котры управляют ярины, дают нам примір, же и в наших климатичных условиях можна легко зберати два раз в року с того самого фалатка поля. Именно добирают они так ярины, штобы зараз по собраню одных, засадити другы и осягают добры результаты.

Призадумайме ся, ци не было бы тото можливе и при сельских господарствах. При звичайной управі хлібных ростин ест тото невозможне, бо час вегетацийный зерна ест долгий. Але если ходит о пашу для статку, то ест тото совсем возможно. Треба лем так добрати земленлоды, штобы оден сходил с поля скорше, а другый мог роснути в поли аж до осени. Земленлодов ест так дуже, же найдут ся меже нима напевно и такы, котры отвітят тым вимогам. Для приміра наведеме гдеякы с них. Понеже тепер сів ростин был бы уж опоздненный, прото обговориме ростины, сѣяны на весну.

Понеже хочеме собрати два раз с поля, треба выбрати добрый фалаток землі. Для той самой причины треба грунт знавозити добрым перегнилым навозом. Як найвчаснійше сіеме мішанку овса, або ячменя с выком або другом стручковом ростинном. Мішанку тоту уживме яко зелену пашу для статку. Если бы мы не потрафили ю скормити, а стручковые ростины почали осаджати стручки, треба мішанку скосити и высушити на сѣно. Если маме в том часі оборник, вывеземе его и приборониме. Если дали мы оборник под мішанку, то можна его уж тепер не давати. Зрозуміла річ, треба выстерігати ся оборника неперегнилого. По приораню садиме зараз брукву (карпелі) або пашну капусту. Если ест в том часі сухо, треба подляти со два раз, если поліе, то подливане ест непотребне. Так бруква, як и пашна капуста ростут до поздной осени и не боят ся приморозков. Капусту можна в загалі с поля не зберати, лем обрывати листе частично в міру потреби. Если ест мороз, то листе скоро отмерзне в теплом поміщеню, н. пр. в стайні, пак без обавы можна давати живині.

При управі бруквы и пашной капусты (ест то род капусты, уживаной на пашу для статку) треба мати приготовлену розсаду. На розсаднику сіеме насіне тых ростин так, штобы на час садження на грунті мати молоду, сильну, радше низку, як високу розсаду.

Селяне ховают относительно дуже статку и нарикают часто, же не мают доходу. Причином того ест брак паши. Повысший примір

Выправа скор домашным способом.

Скоры телячи, кролячи, заячи и инши купуе звичайно по наших селах жидок и платит за них, што хоче. Скоры тоты можна бы было продати по значно вышшой ціні, або ужити их в хаті, если бы мы доложили до того кус труда и стараня.

Передовсем скоры треба знимати осторожно, штобы их не порізати и не покалічити. Зняты скоры треба повісити в тіни волосом под спод, жебы высохла. Лучше ище прибити ю цвячками на досці, або на воротах от стодолы, штобы ся не поморщила.

Коли узберат ся пару скор, а могут то быти скоры телячи, овечи, козі, кролячи, заячи, сарні, псі, котячи и инши, треба их добре вымочити в воді через 3—4 дней. Пак береме по черзі скоры и кладеме их на отверненом корыті, або на кльцоку дерева волосом до споду и тупым ножом чистиме скоры от останков мяса, жил и омасты, а наконец руками вытягаеме скору, килько ся даст, але осторожно, жебы не потріскала. Найлучше тото робити на краю стола. По натягненю поскладати скоры вздолж, волосом до середины, уложити в деревяной кади и заляти вапненным молоком, зробленным со свіжо згашеного вапна, до котрого додаеме кус соды и потажу. Скоры лежат так 15—20 дней. Пак треба их выняти и зас класти на отверненом корытцями, але тепер волосом на верх и тупым ножом цілий волос докладно соскребтати, а наконец добре выполокати. Штобы добре о-

почат, же можна зберати с поля два раз и запевниме для статку много доброй паши. Правда, втратиме кус на зерні, але досвід учит, же на молоці можеме зыскати перешло 5 раз. Если селянин добре надумат ся, то праві в каждом положеню грунту найде такы ростины, котры запевнят му поважне увеличене количества доброй, дешевой паши.

чистити скоры с вапна, добре ест по выполоканю намочити их на 5—6 годин в воді, в котрой роспущено отходы курі, голубі, або псі. На 2 горнцы воды бере ся $\frac{1}{2}$ кг. отходов. В такой течи треба скоры перекладати, и вытиснути, штобы як наилучше ньом пересякли, пак их знова выполокати и выгнести, наилучше ногами в деревянцах. Тепер треба кадь вымыть добре, передом лугом, а пак водом с сольным квасом, а наконец горячом водом.

В кади той укладаме зас выгнетены скоры и заливаме гарбником. Гарбник ест то вода наляна на дубову кору, до котрой додае ся также кору со смерека. Лубок дубовый и смерековый толчеме мігко, заливаме водом и заваряме в котлі. Як выстыне, заливаме тым гарбником скору. Скоры в гарбнику мочит ся 2—3 місяцов, але треба им в том часі часто гарбник змінити (до 10 раз) выливаючи старый и наливаючи свіжий. При зміні гарбника перекладати скоры, штобы ся всі равномерно выгарбовали. По 3-ох місяцах скоры вынимат ся, вытискат и сушит в тіни. Так смаруе ся их омастом и гуажват сильно в руках, штобы омаста всягла и штобы скоры были мягкы и гнучкы.

Кто хоче мати скоры чорны, нехай высмаруе их передом шевским атраментом, або саджом, а так аж омастом. Так выправлены скоры можна добре продати, а в хаті с грубших можна мати пришвы и холявки до скорен, с тоньших обув для дітей и т. п.

Соль для домашних звірят. Як можна купити крухову соль.

Для цілей рольно-годовельных продае ся соль двояку а именно:

- I. Соль быдлячу мелену скажену.
- II. Соль быдлячу нескажену в брылах для лизаня через коровы, коні, овцы и козы.

I. Соль быдлячу мелену продают гуртовні соли а также другы склены, котры повідомят о продажи Уряд Акцыз и Монополей Державных.

Соль быдлячу мелену продае ся без всяких позволенй и посвідок по слідующих цінах:

- 1) в гуртовнях соли: при купні одноразово 50 кг. и больше ціна соли быдлячой меленой выносит 5 злотых и 8 гр. за 100 кг., при купні меньше як 50 кг. ціна соли выносит по $5\frac{1}{2}$ гроша за 1 кг., т. е. 5 зл. 50 гр. за 100 кг.

2) в инших скленах ціна соли быдлячой меленой выносит все, без взгляда на количество, $5\frac{1}{2}$ гроша за 1 кильограм, то ест 5 зл. 50 гр. за 100 кильограмов.

II. Соль быдлячу крухову нескажену до лизаня продают лем гуртовні соли по $6\frac{1}{2}$ гроша за 1 кильограм.

Соль крухову може купити лем тот, кто мае посвідку с громады, килько мае статку, для котрого ест соль перезначена. Посвідку

таку выдае громада або за дармо, або за оплатом, не вышом однак як 30 грошей (Обіжник Мин. Вн. Діл с 16. VI. 1936 р. Нр. 45).

Посвідку на право купна соли для лизаня гмина выдае при конци року. Посвідка ест именна, то значит, же каждый, кто хоче купити крухову соль, мусит ся о ню выстари. Посвідка тота остае в гуртовні. В посвідці кромі имени и анзвиска газды гмина подае, килько штук статку мае газда. В продолженю одного року газда може купити круховой соли: для коровы и коня по 7 кг., для овцы и козы по 3 кг. Газда не мусит купити вшитку соль отраз, може ю купувати частями, а гуртовня соли ест обовязана за каждым разом отнотовати на посвідці, килько газда купил уж соли. Як газда до конца року не выбрал вшиткой соли, то на тоту посвідку в другом році купити соли не може, лем мусит взяти с гмины нову посвідку.

Ціны поданы вышше на соль мелену и крухову сут поданы без опакывкы. Гуртовня може продавати соль в опакывці, дочисляючи за мішок слідуочи ціны:

За мішок ютовый, або льняный на 100 кг. — 1 зл. 60 гр., за мішок льняный на 50 кг. — 1 зл., а за мішок ютовый на 50 кг. — 80 гр.

Если газда однак хоче взяти соль до своего мішка, то гуртовня мусит выдати ему соль без опакывкы, не жадаючи за тото жадной доплаты.

Що чути в світі.

Льондон: Ген. Франко повідомил правительство англицке, же намірят оголосити блокаду Барцельоны. Англицке правительство упередило ген. Франко, же не буде толеровати жадны угрозы относительно брытійських кораблей на испанских водах.

Льондон: Мадрытске правительство має выслати до Лиги Народов острый протест против признаню правительства ген. Франко через Німеччину и Италию.

Льондон: Англия выслала с Мальты часть своей флоты до Испании.

Льондон: Англицке правительство намірят дати цілому цывильному населеню против-газны маски, як лем положене буде того вымагати.

Парыж: Ген. Франко повідомил правительство Франции и Росии, же каждый корабель с оружием и амунициом, довоженом для испанских червеных войск, буде затоплений через испанскы, народовы, военны кораблі.

Парыж: Повстанцы испанскы мают спустити на воду новий корабель и килька подводных лодок, котры уж кончат робити.

Парыж: Правительство француске рішило не признати генер. Франко права блокады катальонского побережа. Францускы кораблі одержали поручене интервениовати оружно в разі, если бы торговельны кораблі пливучи под флягами францускыма были атакованы через силы ген. Франко.

Парыж: До Мадрыта прибыл цілый советскый полк, котрый выслано на фронт. Полк тот має 3.000 людей. Советскы кораблі с оружием будут ескортированы через советскы военны кораблі. В tych днях Советы мают выслати уж другый одділ войков и 200 техников, инженеров и монтеров.

Німеччина и Италия также заповіли высылку регулярных войсковых одділов.

Парыж: Подводны повстанчы лодкы сидили ся сторпедовати в пристани Картагены правительственны кораблі. Одна торпеда трафила в военный корабель мадрытского правительства и сильно его ушкодила. Стерджено, же торпеда походить с німецкых фабрык.

Парыж: Франция приступила до будовы оборонной лении аж до моря. Таким способом ціла полночна граница Франции от Швайцарии аж по Атлянтійскый океан буде уфортыкована. Укріплення находят ся на парудесят метров под земльом. Там в глубинах подземельных будут побудованы шпиталі, магазыны оружия, труючих газоз, резервоары с бензыном и т. д.

Во Франциі полночной в маленьком місточку породила одна жена 4 дівчинкы, котры тішат ся добрым здравем и сут совсем нормальны. Выкликало тото в цілом місточку сенсацию.

Гавр: Дня 29. XI. спущено на воду новий корабель польских морских сил. Єст то подкладач мин.

В Букаресті на принятю в мин. загран. діл німецкый посол Фабригус отказал в поданю руки советскому послу Островскому, выражаючи ся: „убийци моих братов не подаю руки“. Инцидент вызвал небывале порушене.

В Новосибирску отбыл ся процес 9-еро людей, оскаржених о шпйонаж и саботаж против советской власти. В числі том находят ся німец инж. Штиклинг. Всіх засуджено на кару смерти. Німецкый амбасадор в Москві интервениовал у советского правительства, жадаючи помилованя инж. Штиклинга. Предсідатель Центр. Исп. Комитета помиловал инж. Штиклинга и двоих инших засуджених, заміняючи им кару смерти на кару пожизненной тюрьмы.

Москва: Дня 25. XI. начал ся 8-ый незвычайный конгрес Советов на Кремлі. На порядку дня находят ся проект констытуции Союзу Советов.

Рыга: В виду отбывающего ся в Москві конгреса Советов заряджено в місті незвычайны средства осторожности. Всі делегаты, котры приіхали до Москві, находят ся под обсервациом полиции.

Вісти с краю.

Варшава: Дня 25. XI. прибыл до Варшавы румунскый министр заграничных діл Антонеску с официальном вызитом, а также делегация румунской армии.

В Варшаві на университеті урядили студенты против-жидовскы розрухы. По причині повтаряючих ся численних демонстраций, уряджанных студентами, перервано науку на всіх университетах в Варшаві и задержано в арештах 180 студентов.

Варшава: Маршал Польци Е. Смиглы-Рыдз принял в середу на авдиенции німецкого амбасадора фон Мольтке. Єст то перше принятє амбасадора Німеччины через Маршала.

Краков: Краковскый Воевода р. Гноинскый переводит инспекции по урядах своего воеводства. Недавно перепровадил инспекцию Скарбового Уряду в Новом Санчі.

Горлицы: Повіты горлицкый и ясельскый обізджат посол на Сейм, выбранный с tych повітов, бывший вице-министер Д-р. Каз. Дух. Посол интересує ся живо также лемковском частью tych повітов, познакомляючи ся с економичными и культуральными потребами нашого села. На уряджанных депутатом собраниях явят ся все много людей.

Стрільял до лишкы, убил дітину. В селі Каспраль на Куявах килькоро дітей выбрало ся до ліса по пісок, находячий ся недалеко лисьой норы. Одночасно выбрал ся там и управитель маєтку Козерскый. Діти узріли надходячого, перестрашили ся и укрыли в лисьой норы.

Стрїлец спостерег порушаючи ся крякы и был певный, же то лишка утекла до норы. Зачаил ся со стрільбом готовом до стрїла.

По пару минутах 6-літний хлопчик выхылил осторожно головку с норы, штобы ся переконати, же Козерскый уж отышол. Стрїлец, переконанный, же то лишка, стрїлил. Хлопец упал неживый. Суд в Иновроцлаві уневиннил Козерского.

Страшный злочин под Мысленицами. В Глогочові под Мысленицами доконано бестияльського убийства на Судерах, селянах, знанных в окрестности с незвычайного трудолюбия и уцтвности и тішачих ся великом sympathy у всіх. В лісі, отдаленом о парусот метров от хаты Судеров найдено мертве тіло Ст. Судера. На тілі полно было ран толченых, рїзанных и колотых.

В пару годин погодивше найдено в ставі отдаленом о парудесят метров от хаты Судеров также мертве тіло жены Судера, Катарины. Згынула она также от ран, заданных тым самым знярядом, што ним убито ей мужа.

На місце злочина прибыли власти судово-слідчи, котры провадят доходжене.

Бык поранил тяжко монаха. По дворі монастыра в Марковичах ходил бык (бугай), котрого каждого дня выпускано со стайні и котрый был все спокойный. Через двор переходил оден монах. С незнанных причин бык почал нагло шаліти и шмарил ся на монаха. Монах почал утікати, але бык допал его и сильным ударом могучого лба припучил монаха до муру, а пак звернул го на землю и почал тратовати. Страшну борбу человека с росшалілым звірятьом увиділ другый монах, котрый выбіжал на двор, стрїляючи до быка с револьвера. Раненый в передну лопатку бык, от боли отвернул ся от несчастного монаха и через тото удало ся уратовати монаха. Тяжко раненого с поламаныма ребрами, отвезено монаха до шпиталя.

МЕД УЖ ЗАКУПИЛ, БОЛЬШЕ НЕ ПОТРЕБУЮ.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся
в асекураційном Товаристві
ВИТА И КРАКОВСКЕ
во Львові

Асекурацію принимают на цілой Лемковщині
представителі: гг. Осиф Ямовицкый — Крыница - Село
и Михаил Передом — Сянок.